

ՀԱՍՏԱՏՎԱԾ Է՝

ԵՊՀ ՀԻՏԱԿԱՆ ԽՈՐՀՐԴԻ

2018 ԹՎԱԿԱՆԻ ՀՈՒՆԻՍԻ 29-Ի ՄԱՐՏԻ ՆԱԽԱԳԱՀ՝

ԵՊՀ ՀԻՏԱԿԱՆ ԽՈՐՀՐԴԻ ՆԱԽԱԳԱՀ՝

Գ. ՀԱՆՈՒՅԹՈՒՆՅԱՆ



ԱՇԽԱՏԱԿԱՐԳ

**ԵՐԵՎԱՆԻ Վ. ԲՐՅՈՒՍՈՎԻ ԱՆՎԱՆ ՊԵՏԱԿԱՆ ԼԵԶՎԱՀԱՍԱՐԱԿԱԳԻՏԱԿԱՆ
ՀԱՄԱԼՍԱՐԱՆԻ ԳԻՏԱԿԱՆ ԽՈՐՀՐԴԻՆ ԿԻՑ ԷԹԻԿԱՅԻ ՀԱՆՁՆԱԺՈՂՈՎԻ**

I. ԸՆԴՀԱՆՈՒՐ ԴՐՈՒՅԹՆԵՐ

1. Երևանի Վ. Բրյուսովի անվան պետական լեզվահասարակագիտական համալսարանի գիտական խորհրդին կից էթիկայի հանձնաժողովի (այսուհետ՝ Հանձնաժողով) գործառույթներն են համալսարանի անձնակազմի և ուսումնառողների վարքի՝ ԵՊՀ-ի «Էթիկայի կանոնագրքում» ամրագրված էթիկայի սկզբունքներին համապատասխանության քննությունը և բուհի հակակոռուպցիոն քաղաքականության մշակումն ու դրա իրականացման վերահսկումը:
2. Հանձնաժողովն իր գործունեությունն իրականացնում է Հայաստանի Հանրապետության օրենսդրությանը, ԵՊՀ-ի կանոնադրությանը, ներքին իրավական ակտերին ու սույն աշխատակարգին համապատասխան:
3. Հանձնաժողովը գործում է արդարության, թափանցիկության և հաշվետվողականության սկզբունքների հիման վրա:
4. Հանձնաժողովի կազմը ձևավորում է և հանձնաժողովի գործունեության ժամկետը սահմանում է ԵՊՀ-ի գիտական խորհուրդը:
5. Հանձնաժողովի եզրակացության հիման վրա ԵՊՀ-ի ղեկավարը սահմանում է կարգապահական տույժեր և կայացնում է համապատասխան որոշումներ:

II. ՀԱՆՁՆԱԺՈՂՈՎԻ ԳՈՐԾԱՌՈՒՅԹՆԵՐԸ

6. Հանձնաժողովը՝

ա) մշակում և ԵՊԼՀ-ի գիտխորհրդին է ներկայացնում «Էթիկայի կանոնագիրքը», որը ներառում է բուհի անձնակազմի և ուսումնառողների վարքի նորմերի նկարագրությունը և դրանց խախտման համար նախատեսված կարգապահական տույժերը,

բ) ելնելով էթիկայի կանոնագրքում ամրագրված վարքի սկզբունքներից և նորմերից՝ քննում է վարքի նորմերի ենթադրյալ խախտումների վերաբերյալ դիմումները և եզրակացություն է ներկայացնում ԵՊԼՀ-ի ռեկտորին խախտման առկայության կամ դրա բացակայության մասին, առաջարկություն է ներկայացնում խախտման համար նախատեսվող կարգապահական տույժի վերաբերյալ,

գ) մշակում և ԵՊԼՀ-ի գիտական խորհրդի հաստատմանն է ներկայացնում բուհի հակակոռուպցիոն քաղաքականությունը, բուհում կոռուպցիոն երևույթների դեմ պայքարի տարեկան ծրագրերը և ապահովում դրանց իրականացման վերահսկողությունը:

7. Հանձնաժողովը ԵՊԼՀ-ի ստորաբաժանումներից, աշխատակիցներից ու ուսումնառողներից կարող է պահանջել և ստանալ վարքի քննվող դրսևորմանը վերաբերող տեղեկություններ և նյութեր:

III. ՀԱՆՁՆԱԺՈՂՈՎԻ ԱՇԽԱՏԱՆՔԻ ԿԱԶՄԱԿԵՐՊՈՒՄԸ

8. Հանձնաժողովն իր աշխատանքը կազմակերպում է նիստերի միջոցով:

9. Հանձնաժողովի նիստերն իրավազոր են, եթե դրանց մասնակցում է հանձնաժողովի անդամների երկու երրորդը:

10. Հանձնաժողովում որոշումներն ընդունվում են հանձնաժողովի նիստին ներկա անդամների ձայների պարզ մեծամասնությամբ՝ բաց քվեարկությամբ:

11. Քննվող հարցի կողմերը պետք է պատշաճ կերպով տեղեկացված լինեն Հանձնաժողովի նիստի տեղի ու ժամի վերաբերյալ և կարող են ներկա գտնվել այդ նիստին:

**IV. ՀԱՆՁՆԱԺՈՂՈՎԻ ՆԱԽԱԳԱՀԻ, ՆԱԽԱԳԱՀԻ ՏԵՂԱԿԱԼԻ,
ՔԱՐՏՈՒՂԱՐԻ ԵՎ ԱՆԴԱՄՆԵՐԻ ԼԻԱԶՈՐՈՒԹՅՈՒՆՆԵՐԸ ԵՎ
ՊԱՐՏԱԿԱՆՈՒԹՅՈՒՆՆԵՐԸ**

12. Հանձնաժողովի նախագահը՝

- ա) հրավիրում և վարում է Հանձնաժողովի նիստերը,
- բ) ստորագրում է Հանձնաժողովի եզրակացությունները և նիստերի արձանագրությունները,
- գ) ներկայացնում է Հանձնաժողովի աշխատանքը ռեկտորին և գիտխորհրդին,
- դ) անհրաժեշտության դեպքում կարող է հրավիրել մասնագետներ՝ խորհրդակցական ծայնի իրավունքով,
- ե) վարքի նորմի ենթադրյալ խախտման քննության համար բավարար տեղեկատվության բացակայության դեպքում միջնորդությամբ դիմում է ռեկտորին,
- զ) անհրաժեշտության դեպքում հանձնարարում է էթիկայի հանձնաժողովի անդամներին՝ քննվող հարցի վերաբերյալ ուսումնասիրություն կատարելու և ներկայացնելու,
- է) հաշվետու է համալսարանի գիտական խորհրդին և ռեկտորին:

13. Հանձնաժողովի նախագահի տեղակալը՝

- ա) կատարում է Հանձնաժողովի նախագահի պարտականությունները և լիազորությունները նախագահի բացակայության ժամանակ,
- բ) Հանձնաժողովի նախագահի հանձնարարությամբ ծանոթանում է վարքի նորմերի ենթադրյալ խախտման հանգամանքներին և կազմակերպում Հանձնաժողովի նիստ հրավիրելու համար անհրաժեշտ տեղեկությունների հավաքագրումը,

գ) ունի հանձնաժողովի անդամին վերապահված իրավունքներն ու պարտականությունները:

14. Հանձնաժողովի քարտուղարը՝

ա) կազմակերպում է հանձնաժողովի նիստերը,

բ) ապահովում է գրությունների և փաստաթղթերի շրջանառությունը,

գ) կազմում է հանձնաժողովի նիստերի արձանագրությունները

դ) ստանում, գրանցում, պահպանում և հանձնաժողովի նախագահին է փոխանցում գրությունները, վարքի նորմերի խախտման վերաբերյալ դիմումները,

ե) ունի հանձնաժողովի անդամին վերապահված իրավունքներն ու պարտականությունները:

15. Հանձնաժողովի անդամը՝

ա) մասնակցում է էթիկայի կանոնագրքի մշակման աշխատանքներին,

բ) ներկայացնում է առաջարկություններ կանոնագրքում փոփոխություններ իրականացնելու վերաբերյալ,

գ) մասնակցում է Հանձնաժողովի աշխատանքներին, ծանոթանում է նյութին և մինչև նիստը կամ նիստի ժամանակ ներկայացնում կարծիք,

դ) Հանձնաժողովի նախագահի հանձնարարությամբ քննարկվող նյութի վերաբերյալ ներկայացնում է ուսումնասիրություն,

ե) Հանձնաժողովի նիստերին քվեարկում է ընդունվող որոշումների և եզրակացությունների վերաբերյալ: